

الفاجومي

عشت وسط العداوية
والواحية والنمارسه

« سألني ناجي الرسام.. انت شيوعي؟ فقلت أنا مسلم
وموحد بالله.
« واحد مدعي «طرب» يطلب من الشيخ إمام
تقديمه للإذاعة ويقدم لنا أكله كباب.



obekikan.com

أسانسير روز اليوسف ولا كل الأناسير! حاجه كده تفكرك برواد الفضل لما
بيسبحوا بالسرعه الإملائيه.. يعنى لا هو مستعجل على فوق ولا ملهوف على
تحت...

شخص محايد.. ما تعرفش إن كان ماشى بالطول ولا بالعرض لكن وانت جواه
يديك إحساس بالثبات وكأنك ممتطى صهوه جمل سودانى ماشى فى الصحرا على
أقل من أقل من مهله لأنه عارف ومتأكد إن نهاية مشواره يعنى نهاية حياته.

وأنا جوا الأسانسير كنت باهياً نفسى لمقابلة الملحن حلمى أمين عشان أوضح له
المسألة وأكشف له الدسيسه الخسيسه اللي رماها بينى وبينه الأستاذ مراقب عام
الموسيقى والغناء اللي عرفت بعد كده إنه ملحن فاشل ودي كانت عقده من أي فنان
ناجح وعرفت كمان قدراته الإبداعيه فى إذلال وإهانة الفنانين الموهبين.. الشيء اللي
ماعرفتوش إلى وقتنا هذا هو الشخص الشيرير اللي وضع هذا المريض الموتور فى هذا
الموقع الوظيفى الخطير.. مراقب عام الموسيقى والغناء!!

ما علينا.. طلعتنا جمال الموجى وأنا الدور الأخير.. مجله صباح الخير نقابل
حلمى عند صديقه الرسام ناجى كامل حسب اتفاق جمال مع ناجى واستقبلنا ناجى
بترحاب بسيط وقال:

- اتفضلوا.. زمان حلمى جاي..

بهرنى الجوا المجنون فى أوضه الرسامين.. ريحه الحبر النفاذه.. الشخصيات
والرسومات القوضويه بالحبر الشينى على الحيطان.. كل شيء فى الأوضه كان فى
غايه الهرجله الكراسى مكسره والمكاتب وسخه وعليها حاجات غريبه، فوط كان
لونها أصفر زى بتاعه التكسجيه وكبايات بعضها فيه بقايا شاي وبعضها فيه بقايا
قهوه وبعضها فيه ميه سودا مغروز فيها فرش رسم وكلها مليانه أعقاب سجاير

ومشاط كبريت خالصانه والأرض مليانه ورق ملغمط حبر بعضه مفروود وبعضه
مكور.. آخر لخبطه.. لكن لخبطه تسحر حاجه كده تفكر بأشعار صلاح جاهين
المجنونه أو رسومات حجازى قليلة الأدب.

ما أعرفش أنا فضلت قد إيه سارح فى السحر ده لغايه ما سمعت ناجى بيقوللى:

- معانا هنا شاعر اسمه فؤاد قاعود.. تعرفه؟

قلت له:

- أنا قرئت له كتير فى صباح الخير وباحبه وباريت أفدر أشوفه.



قال لى:

- قریت له إيه؟

قلت له:

- قریت له:

المجتمع زى الرصيف

وسخ

وعايز يتكنس

فيه ناس

بتعرق ع الرغيف

وناس

بتعرق م التنس

قال لى:

- إنت شيوعى؟

قلت له:

- لأ.. أنا مسلم وموحد الله

وقعدت أتابع ناجى وهو بيرسم ولا حظت إنه بيمضى ناجى كده ناجى.

قلت له:

- ليه الألف مش طالع عدل؟

قال لى:

- أصل أنا واد مش دوغرى.. أنا لثيم.

وضحكنا وخذنا الكلام ونسيت موعد حلمي وبعد فتره انتظار طويله كان ناجي
خلص شغله وحلمى ما جاش.

- زى عوايده.

قالها لى ناجى وقمنا على وعد باللقاء والحقيقه أن بساطة الفنان ناجى كامل
شجعنتى على التفكير فى معاودة الزياره ودى كانت رغبه ملحه جوايا للتعرف على
هذا العالم العجيب... عالم الصحافه وبالتحديد صحافه مدرسه روز اليوسيف.



بدأت أندمج فى الحياه العامه فى حوش قدم وأتعرف على الخريطه الاجتماعيه
فى هذا المكان العجيب... سكان الحوش ما هماش من أصل واحد... رغم
انصهارهم فى نسيج واحد... فمثلا فيه العدويه النازحين من بنى عدى فى الصعيد
ودول بيشتغلوا فى صناعه السجاد والعيش والجزاره وفيه الواحيه ودول أمهر ناس
فى تزويد قاهره المعز بحبوب منع الفهم ودا تعبيرهم عن الفول والعياذ بالله وخطورة
الواحيه النازحين من الواحات الداخلة والخارجة إنهم ييلعوك الحبوب الملعونه دى
وانت فى غاية الانكشاح والانبساط من طعامه الفول وحلاوته وفيه النمارسه اللى
هما من أبوالنمرس بلديات الشيخ إمام ودول تجار الصينى أيام العز والألامونيا
والميلامين وجميع مشتقات النفط من العصر الحديث، وعن النمارسه حدث ولا
حرج.. تجار أشطر من اليهود وأحرص من الدمايطه وفيه تعبير سايد بيستعمل فى
وصف حركات النص كم بين الأصدقاء اللعي هو:

- إنت حتنمرس على؟! -

عموماً ما تستعجلوش على رزقكم وحتشوفوا نمرسه لما تشبعوا... مثلاً..

صباح يوم جمعه... كنا مأشفرين بما جميعه لا فلوس ولا أكل ولا دخان ولا
صنف ولا دياولو.

قلت له:

- وبعدين يا إمام؟

قال لى:

- ما تقلقش... قوم بينا نشكك حجرين معسل من عبد الرؤف نملا بيهم فراغ المعده وبعدين يخلق فى قضاه رحمه.

بالمناسبه عبد الرؤف ده كان صنايعى فى قهوه العدويه وكان ما بيشككش حاجتن تخلق غير المعسل... ليه بقى؟ المعلم أساساً كان مانع الشكك من أصله والقرار ده كان ماشى على كافة شيء يطلع من تحت إيد النصبجى يعنى الشاى والقهوه والجنزيبيل والينسون والسحلب إلى آخر عيله السوايل... لكن عبد الرؤف العجيب كان مدكن فى جيبه ثلاث أربع ورققات دخان بيعهم لحسابه الخاص لزبون الشكك.

قول قاعدين أنا والشيخ إمام نشد فى البورى لحين ميسره وإذ بحتة أفندى رهيب الأناقه والشياكه واقف قدامنا ومركز عينه على إمام ومتجاهل العبد الفقير تماماً قلت:

- يمكن صديق قديم لإمام وبيحاول يتذكر.. وعموماً تبقى فُرجت ركزت عنيه عليه إنه يعبرنى؟ أبداً... برضه فضل متجاهلنى بطريقه دنيئه استفزتنى ولسه ح أسأله راح داخل ع الشيخ إمام وسأله:

- إنت الشيخ محمد؟

غمزت إمام فى رجله وقلت له:

- أبوه.. هو دا الشيخ محمد.

برضه ابن الجزمه تجاهلنى وقال للشيخ إمام:

- أنا عايزك توصلنى الإذاعه.

غمزت إمام فى رجله تانى وقلت له:

- وماله.. بس انت بتعرف تغنى؟

بص لى باشمئناط وقالى بألاطه شديده:

- أمال يعنى ح أروح الإذاعه ألعب سيجه؟!

قلت له:

- بس لازم الشيخ محمد يسمعك الأول.

قال لى:

- أهلاً بيك وبالشيخ محمد وبعبد الوهاب نفسه.. أنا مستعد.

قلت له:

- إنت فاضى إمتى؟

قال لى:

- فوراً.

قلت له:

- طب اتفضل عندنا فوق بعد ساعه من دلوقتى.

قال لى:

- وليه بعد ساعه؟!

قلت له:

- أصل احنا رايعين ناكل كيلو كباب من عند أبو هاشم.

قال لى:

- شاورولى ع البيت واسبقونى انتو وأنا ح اجيب الكباب والحقكو.

قلت له:

- أصل احنا بعد ما ناكل حنخش الباطنيه نجيب حاجه.

قال لى:

- موجود معايا الصنف.. ومزاج على قوى.

سحبت إمام وطلعنا على فوق واحنا ع السلم قال لى وهو بيضحك:

- مش قلت لك ح يخلق فى قضاة رحمه... أهو خلق فى قضاة لحمه.

حييتين والباب خبط قمت فتحت لقيت الزبون داخل بكيلو الكباب والسلطات والعيش فرش الأكل قدامنا وقال:

- اتفضلوا انتوا بالهنا والشفاء وأنا ح أعمل لكو الشاى وأولع الفحم وأروش البطرمان.. وفى أقل من خمس دقائق كان كيلو الكباب بالعيش بالسلطات اختفى من الوجود... وجبسنا بالشاى.. وبدأت الاصطباحه النميسه وفى نوبة الصهله ضحك إمام وقال:

- إنما احنا ما اتشرفناش بالإسم الكريم.

قال له:

- خدامك سلامه يا شيخ محمد.

قال له:

- تعالى جنبى هنا بقى عشان تدوقنى حلاوتك.

الرجل حصل له رعب وبص لى.

قلت له:

- عمك الشيخ محمد عايز يسمع صوتك.. غنى..

راح فاكك الكرافته الحمرا وزراير القميص الذهب وترس رجله في الأرض وبدأ
يطلع أصوات غريبه من بقه أشبه بأصوات الفيران المولودين لسه.. إمام انتفض وقال:

- إيه دا بابو النجوم.. فيه إيه؟

قلت له:

- ما فيش حاجة.. لا الأستاذ سلامه ح يغنى.

قال لى:

- لا.. فيه حاجة بتزيق زى العرسه.

غمزته بشده وقلت للأستاذ:

- اتفضل يا أستاذ.

قال لى:

- هو الشيخ محمد متضايق من حاجة؟

قلت له:

- لا أبدا.. اتفضل غنى.

وإذا بالأستاذ وبغس الصوت بيغنى:

يا دينى يا امه.

الخليوه بره

هو القمر فى السما.

ويش نزله ع الحيط.

كبدای.

ولداى.

عاد يابوى.

قال له إمام:

- بس بس بس... خلاص.

سكت وبص لى قلت له:

- حتمع النتيجة دلوقتى.

وإذا بالشيخ إمام يقول:

- النتيجة صفر.

الجدع وشه راح لون وجه لون وقال لى:

- إيه؟ ما فيش أمل؟

قلت له:

- الأمل موجود طبعاً... بس انت محتاج تدريب جامد.

قال لى:

- أنا مستعد للتدريب.

قال له إمام:

- باقولك إيه اسمعنى أنا... أنت تشوف لك شغلانه تعملها بعيد عن المغنى..

روح العب كره.. العب طاوله... مثلاً.. لكن إوعى تغنى...

